

Iné rivó in ció al concorso btu in pes da l Istituto ladin de la Dolomites par carì fora zle nostre valade algo d novo zal cianpo dla musica dal dì d incöi

In gara el canzogn ciantade par ladin

Ladinia de Blun

La nova musica ladina s fa conosse in grazia dal concorso organisó da l Istituto ladin de la Dolomites. Ignöre s é cetade a Borcia i esperte dla giuria par dà al giudizio su cöi ch vinzarà i prime tröi poste de sta gara senza partesa, fata picsöia par tastà al tarögn e capì cuance ciantadores ugnoi o in grupo avösa cardù zal zimentasse aped un testo scritto par ladin. Al concorso era stó mandó fora sta insuda passada e al termin par còi su i laore era a mité d luio. A responde al invito dl Istituto iné stade in 17, ch inà mandó a Borcia 42 canzogn.

I autores iné stranaiede ntin zun duta la Ladinia de Blun, da l Agordin, a Zoldo, al Cadore d Medo, al Comelgo. El regole dal concorso didee che n podee partecipé i "core d montagna" e nanche cöi dle gedie, ma dovössa gni fora dal nove forme dla musica dal dì d incöi nasché carateristghe dla nova musica ladina in provincia de Blun. Eco alora che intrà i didsete iné cantautores, grupe rock, blues, folk, duce ch inà ciantó su poesii o parole scrite par ladin.

Sto concorso iné na novità pla Ladinia de Blun, parcheche fin ades iné stade fate snoma prove de poesia e de prosa, anche li ultme de Fodom e Nebbiù, opur d teatro, ma mai un setor com cöl dla musica, che pur pias tanto e iné na parte granda dla vita, picsöia dla dovantù.

A giudiché i laore presentade a l Istituto ladin de la Dolomites sarà diös espertes, zinche pla musica e zinche ple parole, tlosté fora zun zinche valade dla Ladinia, Anpezo, Zoldo, Agordin, Cadore, Comelgo. Con valutaziogn fate su nasché criterie compagns par duce, löre inà pensó e btu insieme el so opiniogn, par rivé a na conclusion al pi possibil obiettiva. Se savarà zle prose stmane chi ch inà vinto, ma siguro s pö bel dì ch inà vinto l idea da föi sto concorso e la musica nova ch iné gnuda a gala. Sarà antares dl Istituto e dle Uniogn ladine organisé zla prosma insuda nascuante serate d concertes par sti musicistes zun dute el valade dla Ladinia.

Zal medesmo tenpo el canzogn gnarà selezionade e, se sarà finanziamöinte assöi, podarà esse rincurede zun cd, una par autor, e btude a disposizion de cuance ch vorà sintì la musica chi né espression dla sensibilità nova ch gira pla Ladinia de Blun.

Lucio Eicher Clere